

Date – 08/05/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Chief Minister Pu Lalduhoman Lungleia NCC Fest leh 2 BN MAP Ground-a Parasailing Camp neih mek chu vawiin khan a hmanpui.
2. School Education Minister Dr Vanlalhlana'n tunhnaia Board exam result an tih chhuah dan chu thil thar a ni lova, danglamna an siam kawngah dawih taka ke pen an tum lo tih a sawi.
3. Mizoram Independent Schools Association chuan kumin pawl 10 leh pawl 12 Board exam result tihchhuaha zirlai naupangte pass na tihlan loh chuan naupang a tihnual an ti.
4. West Bengal-ah BJP kaihhruai sorkar hmasa ber, naktuka la lut turin ruahmanna peihfel a ni.



CM

2 Mizo Battalion NCC te bultuma Lunglei Thuamluaia Mualah National Cadet Corp (NCC) Fest leh 2 BN MAP Ground-a Parasailing Camp neih mek chu Chief Minister Pu Lalduhoman vawiin khan a hmanpui a.

Thusawiin Chief Minister chuan, 2 Battalion NCC te hmalakna a fak a, thalai tam takten NCC zarah nun kawng dik an zawh a, ram tana mi hmantlak ni turin an inzir mek a ti. Mizoram NCC Group Headquarters thar a nei tawh a, phur takin hma an la a, hna a thawk nasa a. Hun reilote chhungin an hmasawna a lang tawh a, NCC a inhmang naupang tam tak sipaiah te, Police-ah te, Territorial Army ah te an lut tawh a ni a ti.

Nu leh pate chu NCC hmalakna thlawp tura chahin ruihhlo a hluar avangin thalai tam takte nun a chhe mek a. Kaihruaitu tha an mamawh a. hetah hian NCC chuan thalaite kaihhruaina lamah tawn hriat an nei tha a, an thiam a, naupangte chu mahni inthunun thei, taima, tawrhchhel leh mi tumruh takah an chhuah thin a. Sipiaiah kal zui kher lo mah se an eizawna kawngah an tangkaipuizui thin a ni, a ti.

NCC Fest hi tun thla ni 5 atanga ni 11 inkar neih tur a ni a. Mizorama NCC Fest hmasa ber a ni.



AIR LUNGLEI

All India Radio kum 90 tlin lawmna pualin AIR Lunglei chuan vawiin khan Lamp Lighting Ceremony a buatsaih a, AIR Director leh Mizoram Cluster Head Pu DR Lalropuia chuan AIR kum 90 puala chhit det chu a hawng a ni.

Vawiina hun hmanah hian Director Pu DR Lalropuia chuan All India Radio chu India in ram zalen anih hma June ni 8, kum 1936 ah din ani a ti a, India zalenna hmuh hmaa mipuite awi tleitu ber alo ni tawh a ti a, thuthar puanchhuahna ringawt nilovin India hmasawna tura thawktu sawrkar leh mipuite thlunzawmtu tangkai tak ani a ti a, tun thlengin mipuite rin ber ani tih sawiin India in Viksit Bharat 2047 hmalaka hnuaia ram hmasawn nih a tumna ah pawh Radio chuan mawhphurhna pawimawh tak a nei tih a sawi a ni.

Pu DR Lalropuia chuan AIR Aizawl leh AIR Lunglei chu hmarchhak station zinga tha pawl ani tih sawiin tunlai thiamna E-Office hmang hmasa zinga mi ani a ti a, ram pumah a tha pawl ni thei turah tan lak zel a tul thu sawiin thawktute theihtawp chhuah turin a chah a, Mipui thinlungah a hlutna a la ngai reng tih sawiin tunlai khawvel hmasawn zelah Radio chuan thil thar hrang hrang a buatsaih tih a sawi bawh.

AIR Lunglei-a Head of Programme Pu Lawmliana Tochhong chuan AIR Lunglei hnathawh hrang hrang sawiin Lunglei mipuite tan AIR chuan tangkai takin hna a thawk thin a ti a, Lunglei District Tennis Association President Pu K. Lalawmpuia chuan Radio chu thudik leh rintlak puangchhuaktu an ni tih sawiin mipuiten an rin ber ani tih a sawi.

All India Radio Aizawl hian kum 90 tlin lawmna pual hian state chhungah lawmna hrang hrang a buatsaih a, tukin khan Aizawl, Lunglei leh Siaha ah Walkathon buatsaih niin a lawmna pui ber June ni 8 ah Chief Minister Pu Lalduhoma hovin Vanapa Hall ah hman a ni dawn a ni.

ASSEMBLY SPEAKER

Assembly Speaker Pu Lalbiakzama'n Artificial Intelligence (AI) a thiamna bulthut (Basic Knowledge) neilo chu tun hmaa ziak leh chhiar thiam lo ang deuh thaw in mi themtlaw nih hun a la thleng thuai dawn tih a sawi.

Vawiina BSI Hall, Upper Khatla-a LushAITech Official-in tunlai thiamna Artificial Intelligence, AI hmanga tawng hrang hrang Mizo tawnga lehlin theihna, LushAIgent : Agentic AI an siam a tlangzarhnaah he thu hi sawiin, Speaker Pu Lalbiakzama chuan khawvel thiamna thang zo zel karah LushAIgent Apps-in Mizote hman tangkai theih tur LushAIgent : Agentic AI an siam chu lawmawm a tih thu sawiin, Agentic AI chu Mizoram mai ni lo, India ramah a hmasa ber tur a ni tih a hriat chuan a ti phur hle a ti a, hetiang thiamna ril bik nei Mizo chhulchhuak an awm chu chhuanawm a tih thu a sawi a ni. Speaker chuan he Agentic AI hian Voice Command a hmang thei tih sawiin, mihring ten hun kan neilo tulh tulh a, Phone leh Computer-a thil chhut na hun tak ngial pawh a uiawm tak avangin, Voice Command hmanga hnathawk thei a nihna chu a that lehzualna a ni a ti a. Hemi kaltlang hian lehkha zirna leh tawng lehlin kawngah, tun aia tha leh changkang zawk a siam theih a nih an beisei tih a sawi a, vawiinah Mizoram in AI-ah bungthar a kai ta chu lawmawm a tih thu a sawi a.

LushAIgent hian Mizo tawng leh English bakah Hindi, Bengali, Tamil, Telugu leh tawng dangte tiamin India ram tawng hrang hrang 12 a thiam a, thu chhut kher ngai lovin Voice Note hmangin hna a thawh theih bakah thusawi mawi taka lo siamthat nan te hman theih a ni.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



EDN MINISTER

School Education Minister Dr Vanlalhlana'n tunhnaia Board exam result an tih chhuah dan chu thil thar a ni lova, Board lianah leh state dangah pawh an hman lai reng a ni a, danglamna an siam kawngah dawih taka ke pen an tum lo tih a sawi.

He thu hi vawiina Aijal Club-ah Mizoram Education Inspecting Officers' Association General Conference a hmanpuinaah sawiin, School Education Minister chuan Inspecting Officer te leh zirtirtute nen zirna kawnga an thawhhonaah tunhnaiah danglamna an siam chho zel a, dawih taka ke pen an tum lo a ti a. Tun hnaia result an tih chhuah dan chu thil thar a ni lova Board lianah leh state dangah pawh an hman lai reng a ni tih sawiin, zirnaite chuan an examah mark hnih khat lekin Division sang an pha lo thei a, mark hnih khat leka dinhmun inthlau taka dah chu naupang zirna lama chak lo zawk tan a tha lova, a ti tha ten chuan mark sang an hmuhin an lawm thova, a tichhe deuh tihnuat thei division chu tul an ti lo tih a sawi a. Zirna lama mi entawn Finland pheih chuan kum 20 chuang ranking an kalpui tawh lo a ti bawk.

Minister chuan Inspecting Officer te chu Performance Grading Index-ah Mizoramin hma a sawn theih nan ngaihtuahna hmang zel tur leh a tul chuan workshop cum round table conference te pawh huaihawt turin a sawm a, an kutah Mizoram hma lam hun a awm avangin, dam chung daih danglamna thlen tura ke pen tlan a ngai a ti bawk a ni.

<><><>

MISA PRESS CONF

Mizorama private school neitu intelkhawm pawl, Mizoram Independent Schools Association (MISA) chuan MBSE-in kumin HSLC Ieh HSSLC result a tihchhuah dana, Merit List, Subject Topper, Letter hmuh zat leh Division a tilang ta lo chuan zirlai naupangte a tihnual a, pawl an tih thu an sawi.

Vawiina Aizawl Press Club-a thuthar thehdarhtute an kawmnaah MISA President Pu Lalnunkunga Sailo chuan MBSE-in kumin HSLC Ieh HSSLC result a tihchhuah dan chuan Mizoram mipui a barakhaih hle tih sawiin, zirlaite tana rualelna - competition tha tak a nuai bo tur chu pawl an ti tak zet a ti a. Hei hian mimala result nei tha leh sikul result nei tha te tarlan lo ni thin chu thai bovin, ang khat vekin a hrut rual a. Deficit school, Private school leh Sorkar school ngawrh leh taima taka zirna kalpui thin te chu inthlahdah taka zirna kalpui tute nen ang khat veka a hrut rual ta mai chu standard tlak hniamna nasa takah an ngai tih a sawi a ni.

MISA President chuan MBSE leh School Education Minister ten result tihchhuah dan an tihdanglam chhanah By-heart system nuai bo an duh vang te, Zirlai exam turte rilru hah lova exam tir an duh vang te leh ICSE leh CBSE te pawhin result an tih chhuah in merit list an tichhuak ngai lo tih an tan chhan chuan awmze ril a nei lo hle niin a sawi a. Mizo naupangte sukthlek enin result puan dan thar chuan naupang tam takah inthlahdahna leh rual el tawk lohna a thlen thei dawn a. Zirlai naupang thiam thei tak tak leh tum sang tak neite a tihnual ngei dawn ni a a lan avangin pawl an ti hle tih a sawi a ni.



GOVT SWEARING IN

West Bengal-a BJP Legislature Party hruaitu atan vawiin khan Suvendu Adhikari thlan a ni a, he state-a BJP Chief Minister hmasa ber a ni dawn a ni. BJP Legislature Party hi Union Home Minister, Amit Shah hovin vawiin khan Kolkata-ah thukhawm Pu Adhikari hi hruaitu atan Amit Shah hian a rawt a ni. BJP sorkar thar lakluh inkhawm hi naktukah Kolkata-a Brigade Parade Ground-ah neih a ni ang.

Assam-ah BJP kaihhruai NDA sorkar thar, tun thla ni 12-ah lakluh a ni dawn a, tun hi a zawna term 3 an chelhna tur a ni. BJP hotu pawimawhte nen nimin khan Guwahati-a Atal Bihari Vajpayee Bhawan-ah sorkar lakluh inkhawm neih dan tur hi rel a ni a, state BJP President Dilip Saikia-a'n thuthar lakhawmtute a hrilh danin sorkar thar lakluh inkhawmah hian Prime Minister Narendra Modi, Union Home Minister Amit Shah, BJP National President, Nitin Nabin-a leh NDA rorelna state Chief Minister leh Dy Chief Minister-te tel tura beisei an ni.

Hetih lai hian Keralam sorkar thar din tura Cong kaihhruai UDF hmalakna chuan hma a sawn zel a, Cong hian Pathianni lo awm turah hian an hruaitu tur an puan rin a ni.

Hetih lai vek hian Tamil Nadu assembly inthlana party mala seat la hnem ber, TVK kaihhruai sorkar din turin party hrang hrangte, ngawrh takin an inbe chhonzawm zel a, thu tlukna hriat theih thuai beisei a ni.

